

**О‘ЗБЕКИСТОН RESPUBLIKASI  
VAZIRLAR MAHKAMASINING  
QARORI**



**ПОСТАНОВЛЕНИЕ  
КАБИНЕТА МИНИСТРОВ  
РЕСПУБЛИКИ УЗБЕКИСТАН**

« 16 » март 2019 у.

№ 224

Toshkent sh.

**Қимматбаҳо металлларни олтин изловчилар усулида қазиб олиш фаолиятини амалга ошириш тартиби тўғрисидаги низомни тасдиқлаш ҳақида**

Ўзбекистон Республикаси Президентининг “Қимматбаҳо металлларни олтин изловчилар усулида қазиб олиш фаолиятини амалга ошириш учун шарт-шароитлар яратиш чора-тадбирлари тўғрисида” 2018 йил 26 ноябрдаги ПҚ–4030-сон қарори ижросини таъминлаш мақсадида Вазирлар Маҳкамаси қарор қилади:

1. Қимматбаҳо металлларни олтин изловчилар усулида қазиб олиш фаолиятини амалга ошириш тартиби тўғрисидаги низом иловага мувофиқ тасдиқлансин.

2. Ўзбекистон Республикаси Давлат геология ва минерал ресурслар қўмитаси Ўзбекистон Республикаси Экология ва атроф муҳитни муҳофаза қилиш давлат қўмитаси билан биргаликда қимматбаҳо металлларни олтин изловчилар усулида қазиб олиш нормалари ва қоидаларига, шунингдек, табиатни муҳофаза қилишга оид қонун ҳужжатлари талабларига риоя қилиниши устидан белгиланган тартибда қатъий назорат ўрнатсин.

3. Ўзбекистон Республикаси Давлат геология ва минерал ресурслар қўмитаси манфаатдор вазирлик ва идоралар билан биргаликда ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштирсин.

4. Мазкур қарорнинг бажарилишини назорат қилиш Ўзбекистон Республикаси Давлат геология ва минерал ресурслар қўмитаси раиси Б.Ф. Исламов зиммасига ва Ўзбекистон Республикаси Вазирлар Маҳкамасининг Ёқилғи-энергетика соҳаси ва саноатнинг базавий тармоқларини ривожлантириш масалалари котибиятига юклансин.

Ўзбекистон Республикасининг  
Бош вазири



А. Арипов

Вазирлар Маҳкамасининг  
2019 йил “16” март даги 224 -сон қарорига  
илова

## **Қимматбаҳо металлларни олтин изловчилар усулида қазиб олиш фаолиятини амалга ошириш тартиби тўғрисидаги НИЗОМ**

### **1-боб. Умумий қондалар**

1. Ушбу Низом ер қаъри участкаларида юридик ва жисмоний шахслар томонидан қимматбаҳо металлларни олтин изловчилар усулида қазиб олиш фаолиятини амалга ошириш тартибини белгилайди.

2. Ушбу Низомда қуйидаги асосий тушунчалар қўлланилади:

**олтин изловчилар усулида қазиб олиш** – ер қаъри участкалари, шу жумладан, сочма олтин конларидан тадбиркорлик таваккалчилиги асосида қимматбаҳо металлларни носаноат усулда қазиб олиш;

**сочма олтин кони** – туб олтин кон ёки олтин маъданли тоғ жинси парчаланиши натижасида ҳосил бўлувчи ер юзасидаги ёки кўмилган тоғ жинси ва минераллари майда бўлақларининг тўпламлари;

**“E-IJRO AUKSION” ягона электрон савдо майдончаси** (кейинги ўринларда савдо майдончаси деб аталади) – электрон онлайн-аукционларни (кейинги ўринларда аукцион деб аталади) ташкил этиш ва ўтказиш учун зарур бўлган ахборотни киритиш, сақлаш ва қайта ишлаш, шунингдек, манфаатдор шахсларнинг аукционлар жараёнларидан оператор веб-портали орқали бевосита фойдаланиш имкониятини таъминлайдиган ахборот тизими;

**электрон онлайн-аукцион** – салоҳиятли харидорларга тенг имконият яратган ҳолда мол-мулк ва ҳуқуқ Интернет тармоғидаги “E-IJRO AUKSION” ягона электрон савдо майдончасида сотиладиган аукцион шаклидаги электрон савдо усули;

**оператор** – савдо майдончасида аукционларни ташкил этадиган ва ўтказадиган “Электрон онлайн-аукционларни ташкил этиш маркази” давлат унитар корхонаси;

**аукцион иштирокчиси** – электрон онлайн-аукционда иштирок этиш учун ариза берган ва унда иштирок этишга рухсат этилган юридик ва жисмоний шахслар;

**лот** – электрон онлайн-аукционда реализация қилинадиган, муайян ер қаъри участкасида қимматбаҳо металлларни олтин изловчилар усулида қазиб олиш фаолиятини амалга ошириш ҳуқуқи;

**“E-IJRO AUKSION” ягона электрон савдо майдончасидаги техник узилиш** – иштирокчилардан бирига электрон онлайн-аукционда иштирок этишга имкон бермайдиган ёки оператор ходимига электрон онлайн-аукцион ўтказилишига хизмат кўрсатишнинг техник имкониятини таъминламайдиган электрон савдо майдончасидаги техник носозликлар;

**қимматбаҳо металлларни сотиб олувчи ихтисослаштирилган қабул кассалари** (кейинги ўринларда қабул кассалари деб аталади) – қимматбаҳо металлларни қайта ишлаш ташкилоти ҳамда шартнома асосида юридик ва жисмоний шахслардан таркибида олтин бўлган хомашёни қабул қилувчи пункт;

**бузилган ерларни рекультивация қилиш (қайта тиклаш)** – ерларнинг табиий ландшафттини сақлаш мақсадида ер қаъридан фойдаланиш натижасида бузилган (ағдарилган, ковланган) ер участкаларини кейинчалик ундан фойдаланишга яроқли ҳолга келтириш билан боғлиқ комплекс ишларни бажариш.

3. Қимматбаҳо металлларни олтин изловчилар усулида қазиб олиш учун берилаётган ер қаъри участкаларидан фойдаланиш ҳуқуқи учун лицензиялар Ўзбекистон Республикаси Давлат геология ва минерал ресурслар қўмитаси (кейинги ўринларда Давлат геология қўмитаси деб аталади) томонидан электрон онлайн-аукцион натижаларига асосан ушбу Низомнинг 1-иловасига мувофиқ схема бўйича берилади.

#### **2-боб. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш ҳуқуқи учун лицензиялар**

4. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш ҳуқуқи учун лицензия (кейинги ўринларда лицензия деб аталади) унинг эгасига белгиланган ҳудудда қимматбаҳо металлларни олтин изловчилар усулида қазиб олиш ҳуқуқини беради, бунда қимматбаҳо ва нодир металллар, қимматбаҳо тошларни қазиб олиш ҳуқуқига алоҳида лицензия олиш талаб қилинмайди.

5. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш ҳуқуқи учун лицензия Ўзбекистон Республикаси Вазирлар Маҳкамаси томонидан ҳар йили тасдиқланган қимматбаҳо металлларни олтин изловчилар усулида қазиб олишга рухсат бериладиган ер қаъри участкалари (кейинги ўринларда ер қаъри участкалари деб аталади) бўйича уларни қазиб олиш учун берилади.

Қимматбаҳо металлларни олтин изловчилар усулида қазиб олиш фаолиятини амалга ошириш учун ишончли, аниқ контурлари ва чегаралари кўрсатилган ер қаъри участкалари, шу жумладан, ўлчамлари 1 гектардан ортиқ бўлмаган сочма олтин конлари берилади.

6. Қимматбаҳо металлларни олтин изловчилар усулида қазиб олиш фаолиятини амалга ошириш учун лицензияларга Ўзбекистон Республикаси фуқароси бўлган жисмоний шахслар ва Ўзбекистон Республикаси ҳудудида давлат рўйхатидан ўтган юридик шахслар талабгор бўлишлари мумкин.

7. Лицензияни ёки ер қаъри участкасидан (тўлиқ ёки қисман) фойдаланиш ҳуқуқини учинчи шахсга бериш (топшириш), шунингдек, битта ер қаъри участкасидан фойдаланиш ҳуқуқига лицензияни бир неча шахсга беришга йўл қўйилмайди.

### **3-боб. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш шартлари**

8. Ер қаъри участкаларидан фойдаланиш лицензияда назарда тутилган шартларга мувофиқ амалга оширилади.

9. Ер қаъри участкаларидан фойдаланишнинг асосий шартларига “Ер ости бойликлари тўғрисида” Ўзбекистон Республикаси Қонунининг 33, 35, 37, 40 ва 43-моддалари билан белгиланган шартлар киреди.

Ер қаъри участкаларидан фойдаланишнинг намунавий шартлари Давлат геология кўмитасининг расмий веб-сайтида жойлаштирилади ва зарурат бўлганда белгиланган тартибда оммавий ахборот воситаларида эълон қилиниши мумкин.

10. Ер қаъри участкаларидан фойдаланиш шартларида:

қимматбаҳо металлларни олтин изловчилар усулида қазиб олишнинг рухсат этилган усуллари ва воситалари, шунингдек, фойдаланиладиган асбоб-ускуналар, механизмлар ва техникага қўйиладиган талаблар;

қазиб олинган қимматбаҳо металлларга эгалик қилиш ҳуқуқи;

ер қаъри участкаларидан фойдаланишнинг чекланиши, тўхтатиб қўйилиши ёки муддатидан олдин тўхтатилиши мумкин бўлган шартлар;

ер қаъри участкасидан фойдаланиш ҳуқуқи тугатилгандан сўнг ер қаъридан фойдаланувчилар зиммасига ер қаъри участкаларини рекультивация қилиш ва уларни кейинчалик фойдаланиш учун яроқли ҳолатга келтириш мажбурияти назарда тутилади.

### **4-боб. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш муддатлари**

11. Лицензиялар Давлат геология кўмитаси томонидан «E-IJRO AUKSION» электрон савдо майдончасидаги аукцион яқунлари бўйича 3 йил муддатга берилади.

Ер қаъри участкаларидан фойдаланиш ҳуқуқи лицензия берилган кундан бошлаб ҳисобланади.

12. Лицензия муддати тугагандан сўнг уч ойдан ошмаган муддатда ер қаъридан фойдаланувчилар томонидан ер қаъри участкалари белгиланган тартибда рекультивация қилиниб, улар кейинчалик фойдаланиш учун яроқли ҳолатга келтирилган ҳолда тегишли туман (шаҳар) ҳокимлигига топширилади.

### **5-боб. Қимматбаҳо металлларни олтин изловчилар усулида қазиб олишга рухсат бериладиган ер қаъри участкаларидан фойдаланиш ҳуқуқини реализация қилиш учун аукционга қўйиш тартиби**

13. Давлат геология кўмитаси Ўзбекистон Республикаси Вазирлар Маҳкамаси томонидан ер қаъри участкалари рўйхати тасдиқлангандан сўнг 5 кун мобайнида аукционда реализация қилиш учун ер қаъри участкаси бўйича тегишли маълумотлар тайёрланишини таъминлайди.

14. Ер қаъри участкасидан фойдаланиш ҳуқуқини аукционга қўйиш тўғрисидаги қарор ушбу бандда келтирилган тегишли маълумотлар тайёрлангандан сўнг 1 кун мобайнида Давлат геология қўмитаси томонидан қабул қилинади ва унда қуйидагилар кўрсатилади:

ер қаъри участкасининг номи (ёки рақами) ва жойлашган жойи (географик координатали нукталари билан Google харита дастурида геолокация);

ер қаъри участкасининг белгиланган мақсади;

ер қаъри участкаси жойлашган жойнинг фотосурати (15x20 см);

ер қаъри участкасининг майдони (гектарда);

ер қаъри участкаларидан фойдаланиш ҳуқуқини савдога қўйишнинг бошланғич нархи;

ер қаъри участкасидан фойдаланишни амалга ошириш муддати;

ер қаъри участкасидан фойдаланиш шартлари.

15. Давлат геология қўмитаси ушбу Низомнинг 14-бандида келтирилган тегишли маълумотлар тайёрлангандан сўнг 1 кун мобайнида операторга ер қаъридан фойдаланиш ҳуқуқини реализация қилиш бўйича аукцион ташкил қилиш ҳақидаги электрон буюртмани (кейинги ўринларда буюртма деб аталади) ушбу Низомнинг 2-иловасига мувофиқ шаклда тақдим қилади.

Буюртма операторга йил давомида ҳар ҳафтада бериб борилади. Бунда бир мартада 20 тагача ер қаъри участкалари берилиши мумкин.

16. Ушбу Низомнинг 14-бандида кўрсатилган ҳужжатлар тўплами Давлат геология қўмитаси томонидан тўлиқ бўлмаган ҳолда тақдим этилса, ер қаъридан фойдаланиш ҳуқуқини реализация қилиш бўйича аукцион ташкил қилиш ҳақидаги электрон буюртмани қабул қилиш рад этилиши мумкин.

Ушбу ҳолатда оператор буюртмани олгандан сўнг кейинги иш кунидан кечиктирмасдан буюртмани бартараф этилиши лозим бўлган камчиликларни кўрсатган ҳолда Давлат геология қўмитасига қайтаради.

Давлат геология қўмитаси оператор томонидан қайд этилган барча камчиликларни 3 кун мобайнида бартараф этиб, буюртмани ушбу Низомнинг 14-банди талабларига мувофиқ тақдоран операторга юборади.

17. Оператор белгиланган талабларга жавоб берадиган буюртма ва унга илова қилинган ҳужжатларни олган кундан кейинги иш кунидан кечиктирмай аукционни ўтказиш ҳақидаги хабарномани ўзининг веб-порталига жойлаштиради.

18. Давлат геология қўмитаси юридик ва жисмоний шахсларни аукционда иштирок этишга кенг жалб қилишга доир чораларни кўради, шу жумладан, олинган ҳужжатлар ва ахборотни аукционда иштирок этиш учун буюртма жойлаштириладиган Операторнинг веб-портал манзилига таянган ҳолда ўз расмий веб-сайтида жойлаштиради.

## **6-боб. Аукционни ташкил қилиш ва ўтказиш**

### **1-§. Аукционни ташкил қилиш ва ўтказишнинг умумий шартлари**

19. Ер участкаларидан фойдаланиш ҳуқуқи Давлат геология қўмитаси томонидан берилган буюртмалар бўйича оператор томонидан аукционга қўйилади.

Ер участкаларидан фойдаланиш ҳуқуқи аукционга ушбу Низомга мувофиқ ҳар бир ер қаъри участкаси бўйича алоҳида қўйилади.

Оператор томонидан оператор ва Давлат геология қўмитаси ўртасида тузилган шартномага мувофиқ аукционни ташкил этиш хизматлари кўрсатилади.

20. Ер қаъридан фойдаланиш ҳуқуқини реализация қилиш бўйича савдолар аукцион шаклида фақат савдо майдонида ўтказилади ва унда Ўзбекистон Республикаси фуқароси бўлган жисмоний шахслар ва Ўзбекистон Республикаси ҳудудида давлат рўйхатидан ўтган юридик шахслар иштирок этишга ҳақли.

Аукцион Интернет тармоғи орқали иштирок этиш имконини берадиган ва аризаларни қабул қилиш ҳамда ғолибларни аниқлаш жараёнларига аралашиб имкониятларини истисно қилувчи махсус дастурий маҳсулотдан фойдаланган ҳолда ўтказилади.

21. Аукционни ўтказиш тўғрисидаги хабар ва лот ҳақидаги ахборот аукцион бошланишидан аввал 5 иш кунидан кечиктирмасдан операторнинг веб-порталида жойлаштирилади.

22. Аукционларда электрон рақамли имзо билан тасдиқланган электрон аризаларни тақдим этиш ва закат пулини киритиш орқали иштирок этилади.

23. Аукцион нархларни ошириб бориш принципи бўйича ўтказилади.

24. Ер қаъридан фойдаланиш ҳуқуқи аукционга буюртмада кўрсатилган бошланғич нарх бўйича қўйилади.

Ушбу Низомда назарда тутилган ҳолатлар ва тартибда аукцион ўтказилмаган деб эътироф этилган тақдирда, ер қаъридан фойдаланиш ҳуқуқи такрорий аукционга бошланғич нархда қўйилади.

25. Аукционни ташкил этиш бўйича хизматлар учун оператор шартномада белгиланган, бироқ аукцион объекти реализация қилинган сумманинг бир фоизидан ошмаган миқдорда ҳақ олади.

Аукцион савдолари ўтказилмаган деб топилган тақдирда, аукционни ташкил этиш бўйича хизматларга ҳақ тўланмайди.

## **2-§. Аукционни ўтказиш тўғрисидаги хабарномани жойлаштириш**

26. Оператор Давлат геология қўмитаси буюртмаларига мувофиқ ўз веб-порталида аукцион ўтказилиши тўғрисидаги хабарномани жойлаштирилади.

27. Хабарнома қуйидаги маълумотларни ўз ичига олиши зарур:

а) аукцион ўтказиладиган сана, шу жумладан, унинг бошланиш ва тугаш вақти;

б) лот рақами ва номланиши;

в) аукционда иштирок этиш учун аризаларни қабул қилишнинг охириги санаси ва вақти;

г) ер қаъри участкасидан фойдаланиш ҳуқуқини амалга ошириш жойи ва муддати;

д) ер қаъри участкаларидан фойдаланиш шартлари;

е) ер қаъри участкасидан фойдаланиш ҳуқуқини беришдан белгиланган мақсад;

ж) ер қаъри участкаси жойлашган жойнинг фотосурати (15x20 см);

з) аукцион объектнинг бошланғич нархи;

и) ер қаъри участкасининг жойлашган жойи (географик координатали нуқталари билан Google харита дастурида геолокация);

к) закат пулининг бошланғич нархдан фоиз кўринишида ва қатъий суммада ифодаланган миқдори, закат пули ўтказилиши лозим бўлган операторнинг банк реквизитлари;

л) Давлат геология қўмитасининг манзили ва телефон рақами.

28. Операторнинг веб-порталида юридик ва жисмоний шахсларга хабарнома ва лот бўйича батафсил маълумот, шунингдек, ушбу Низомнинг 14-бандида кўрсатилган ҳужжатлар билан эркин танишиш имконияти таъминланади.

Операторнинг веб-порталида аукционни ўтказиш қоидалари билан танишиш имконияти яратилади.

Оператор тадбиркорлик субъектларини оммавий ахборот воситалари орқали, шунингдек, бошқа усулларда аукционларда иштирок этиш тартиби хақида мунтазам таништириб боради.

### **3-§. Аукционда иштирок этиш шартлари**

29. Аукционда иштирок этиш учун аризалар хабарнома жойлаштирилган кундан бошлаб операторнинг веб-порталида автоматик тарзда қабул қилинади.

30. Юридик ва жисмоний шахслар хабарнома жойлаштирилган кундан бошлаб 4 кун мобайнида аукционда иштирок этишга электрон шаклда аризалар топширади ҳамда электрон аризада қайд этилган лот рақами ва номи бўйича электрон савдолар очилган куни 1 кун мобайнида аукционда қатнашади.

Аризани қабул қилиш аукционни ўтказиш кунидан икки кун олдин соат 13.00 да яқунланади.

Аризаларни қабул қилиш учун белгиланган муддат ўтгандан кейин тушган аризалар қабул қилинмайди.

31. Иштирокчиларнинг аризаларини қабул қилиш қуйидаги тартибда амалга оширилади:

аризалар электрон кўринишда ушбу Низомнинг 3-иловасига мувофиқ шаклда берилади;

ариза берувчи веб-сайтдан иштирокчи сифатида рўйхатдан ўтади ҳамда унга автоматик тарзда шахсий кабинет ва шахсий ҳисоб рақами очилади;

иштирокчи ўзи томонидан танланган лотнинг закат пулидан кам бўлмаган миқдорда шахсий ҳисоб рақамини тўлдиради ва ариза юборади. Закат пули иштирокчининг шахсий ҳисоб рақамидан автоматик тарзда ечиб олинади;

агар иштирокчининг пул маблағи етарли бўлмаса, унинг аризаси қабул қилинмайди.

Аукцион иштирокчиси аризасини чақириб олиш имкониятига эга.

32. Аукционда иштирок этиш учун закат ер қаъри участкасидан фойдаланиш ҳуқуқи бошланғич нархининг 5 фоизи миқдорида белгиланади ва операторнинг банк ҳисоб рақамига ўтказилади.

Агар иштирокчининг пул маблағи етарли бўлмаса, унинг аризаси қабул қилинмайди.

33. Аукцион иштирокчиси ариза қабул қилишнинг охириг муқддидан кечиктирмасдан, ушбу Низомнинг 4-иловасига мувофиқ билдиришномани операторга юбориш орқали аукционда иштирок этиш учун аризани ўзгартириш ёки чақириб олишга ҳақли.

Аукционда иштирок этиш учун ариза чақириб олинган ҳолларда оператор тўланган закат пулини ариза чақириб олинган заҳоти автоматик тарзда аукцион иштирокчисининг ҳисоб рақамига қайтаради.

Аукцион иштирокчисига закат пули қайтарилганда банк ҳисоб рақами нотўғри кўрсатилганлиги ёки бошқа сабабларга кўра, тўлов операторнинг банк ҳисоб рақамига қайтиб тушган ҳолатда, оператор аукцион иштирокчисини бу ҳақда огоҳлантиради ва аниқ банк маълумотлари бериш талабини кўяди. Бу ҳолатда, олдиндан закат пули аукцион иштирокчиси томонидан аниқ банк маълумотлари берилган кундан кейинги иш кунидан кечиктирмасдан қайтарилади.

34. Иштирокчилар аризалари автоматик тарзда текширилади.

Аукцион иштирокчиларига улар аукционда иштирок этишда фойдаланиш учун шахсий тартиб рақамлари берилади.

35. Ариза ва унга илова қилинган ҳужжатлар белгиланган талабларга мувофиқ тўлдирилган ва юборилган, шунингдек, закат пули шахсий ҳисоб рақамидан тўлик тушгандан кейин автоматик тарзда қабул қилинади.

36. Ариза ва унга илова қилинган ҳужжат белгиланган талабларга мувофиқ тўлдирилмаган ва жўнатилмаган, закат пули операторнинг банк ҳисоб рақамига тўланмаган ёки тўлик тўланмаган ҳолларда автоматик тарзда аризаси рад қилинади ва бу ҳақда иштирокчининг электрон почтасига билдиришнома юборилади.

37. Аукцион иштирокчиси хабарномада кўрсатилган аризани қабул қилиш вақти якунлангунига қадар аукционда иштирок этишга аризани ундаги камчиликларни бартараф қилган ҳолда такроран юборишга ҳақли.

38. Оператор аризалар ва унга илова қилинган ҳужжатларнинг сақланишини, шунингдек, уларнинг сир тутилишини таъминлайди.

Аризаларни қабул қилиш даврида, шунингдек, аукционни ўтказиш давомида операторнинг веб-порталида аукцион иштирокчилари ҳақидаги маълумотларни (жисмоний шахснинг фамилияси, исми, отасининг исми, яшаш манзили, юридик шахснинг номи ва почта манзили, солиқ тўловчининг идентификация рақами, иштирокчини аниқлаш имконини берадиган бошқа маълумотларни) акс эттиришга йўл қўйилмайди.

#### **4-§. Аукционда иштирок этиш тартиби**

39. Аукцион операторнинг веб-порталидаги хабарномада кўрсатилган кунда ва вақтда бошланади.

40. Аукцион унга қўйилган икки ва ундан ортиқ иштирокчи мавжуд бўлганда ўтказилади.

41. Тегишли лот бўйича аукцион бошлангач, веб-порталда аукцион бошлангани ҳақидаги маълумот автоматик тарзда янгиланади.
42. Аукцион иш куни мобайнида соат 9.00 дан соат 18.00 гача ўтказилади.
43. Ер каъри участкаларидан фойдаланиш ҳуқуқини савдога қўйишнинг бошланғич нархи 7,5 млн сўмни ташкил қилади.
44. Аукционнинг ҳар бир босқичи аукцион объекти бошланғич нархининг 5 фоизи миқдорида белгиланади.
45. Аукцион иштирокчиларига ихтиёрий равишда аукцион ставкасини мазкур Низомнинг 44-бандида ўрнатилган аукцион босқичининг 2, 5, 10 ёки 20 баробари миқдорида белгилаш имконияти берилади.
46. Аукцион унинг иштирокчиларидан лотни бошланғич нархдан битта босқичга оширилган нархда сотиб олиш бўйича таклифни тасдиқлашни сўрашдан бошланади.
47. Агар таклиф берилгандан кейин 10 дақиқа давомида аукцион иштирокчиларидан бири белгиланган босқичга оширилган лот нархини тасдиқласа, кейинги таклифни тасдиқлаш учун вақт яна 10 дақиқага узайтирилади.
48. Агар тасдиқланган охириги таклифдан сўнг 10 дақиқа давомида кейинги оширилган лот нархи бўйича таклиф аукцион иштирокчиларининг биронтаси томонидан тасдиқланмаса, аукцион унинг натижалари ҳақидаги баённомани автоматик тарзда шакллантирган ҳолда яқунланади. Лот нархи бўйича таклифни охириги тасдиқлаган иштирокчи аукцион ғолиби деб топилади.
49. Агар лот нархини ошириш бўйича таклифни охириги тасдиқлаган аукцион иштирокчиси таклифини аукционни ўтказиш вақти яқунланишига 10 дақиқадан кам қолганда амалга оширган бўлса, аукционни ўтказиш вақти охириги таклиф тасдиқланган пайтдан бошлаб кейинги 10 дақиқага узайтирилади. Кейинги ҳар бир таклиф аукционни ўтказиш вақтини 10 дақиқадан узайтириб боради. Бироқ, бунда аукционни ўтказиш вақти 3 соатдан ортиқ бўлмаган муддатга узайтирилиши мумкин ва аукцион соат 21.00 га қадар яқунланиши лозим. Лот нархи бўйича охириги таклифни соат 21.00 га қадар билдирган иштирокчи аукцион ғолиби деб топилади.
50. Савдо майдончасида аукционни ўтказишга тўсқинлик қиладиган техник узилиш содир бўлган ҳолларда аукцион ўтказиш санаси ва вақти ҳақида аукцион иштирокчиларига хабар берилган ҳолда аукцион техник узилиш бартараф қилинган кундан кейинги кунда давом эттирилади.
51. Аукцион яқунлангандан кейин веб-порталда аукцион яқунлангани ва унинг натижалари ҳақидаги маълумот автоматик тарзда янгиланади.  
Аукцион яқунланганда операторнинг веб-порталида қуйидаги маълумотлар акс эттирилади:  
лотнинг бошланғич нархи;  
охириги ва охиригидан олдин тасдиқланган таклифлар (охириги ва охиригидан олдинги босқичларни ҳисобга олган ҳолда аукцион иштирокчилари томонидан тасдиқланган таклифлар бўйича шаклланган нархлар);  
аукцион ғолибининг ҳамда охиригидан олдин таклифни тасдиқлаган аукцион иштирокчиси ҳақидаги тегишли маълумотлар.

52. Аукцион қуйидаги ҳолларда ўтказилмаган деб ҳисобланади:  
унда иштирок этиш учун ариза тушмаган бўлса;  
аукционда иштирок этиш учун бирорта ҳам иштирокчи қатнашмаган бўлса;  
аукцион иштирокчилари томонидан бирорта ҳам таклиф тасдиқланмаса;  
аукционда иштирок этиш учун фақат бир нафар иштирокчи қўйилган бўлса;

ушбу Низомда белгиланган тартибда аниқланган аукцион ғолиби ва охиридан олдинги таклифни тасдиқлаган иштирокчи томонидан аукцион объекти қийматининг 100 фоизи белгиланган муддатда тўлиқ тўланмаса.

53. Аукцион ўтказилмаган деб ҳисобланганда, операторнинг веб-порталида автоматик тарзда бу ҳақда унинг сабаблари, шунингдек, лотнинг бошланғич нархи кўрсатилган маълумот акс эттирилади.

54. Аукцион ўтказилмаган деб ҳисобланганда, ер қаъри участкасидан фойдаланиш ҳуқуқи ушбу Низомнинг 26-51-бандларида белгиланган тартибда ўтказиладиган аукционга автоматик тарзда такроран қўйилади.

55. Такроран аукционга қўйилганда:

ер участкасидан фойдаланиш ҳуқуқи аукцион объектининг бошланғич нархида қўйилади. Такрорий аукционлар 2 маротаба ўтказилади;

такрорий аукцион ўтказилмаган деб топилган тақдирда, оператор Давлат геология қўмитасини бу ҳақда электрон хат билан хабардор қилади ҳамда аукцион объектини аукцион савдосидан олади.

#### **5-§. Аукцион натижалари бўйича ҳисоб-китоб қилиш ва аукцион натижалари тўғрисидаги баённомани расмийлаштириш тартиби**

56. Аукцион ғолиби аукцион якунланган кундан бошлаб 3 кундан кечиктирмай аукционда сотилган ер қаъри участкаси объектининг қийматини операторнинг ҳисоб рақамига тўлиқ тўлаб бериши лозим.

Аукцион ғолиби ер қаъри участкаси объектининг ғолиблик тўловини шахсий ҳисоб рақамидан тасдиқлаш йўли билан амалга оширади.

Бунда ушбу аукцион объекти бўйича аввал тўланган закат пули аукцион объектининг 100 фоиз қийматига қўшиб ҳисобланади.

Ғолиб томонидан аукцион объектининг 100 фоиз қиймати тўлиқ тўлангандан сўнг оператор 1 кун давомида:

аукционни ташкил этиш бўйича хизматлар ҳақини ушлаб қолган ҳолда аукцион объектини реализация қилишдан тушган маблағларни Давлат геология қўмитаси буюртмасида кўрсатилган даромад газна ҳисобварағига ўтказиши;

махсус бланкада аукцион натижалари ҳақидаги баённомани расмийлаштиради, уни муҳр билан тасдиқлайди.

57. Аукцион натижалари ҳақидаги баённомада қуйидаги маълумотлар кўрсатилади:

а) ўтказилган аукцион санаси;

б) Давлат геология қўмитасининг ер участкаларидан фойдаланиш ҳуқуқи аукционга қўйилиши бўйича берган буюртмаси;

в) лот рақами;

г) аукцион объектининг бошланғич нархи;

д) аукцион объектининг сотилган нархи;

е) аукцион ғолиби;

ж) аукцион объекти, шу жумладан:

ер қаъри участкасининг номи (рақами), у жойлашган жойи;

ер қаъри участкасидан фойдаланишни амалга оширишнинг белгиланган мақсади;

ер қаъри участкасидан фойдаланиш муддати.

58. Оператор ўтказилган аукцион натижалари ҳақидаги баённомани у расмийлаштирилган куннинг ўзида аукцион ғолибининг шахсий кабинетига, Давлат геология қўмитасига тақдим этади ва ўз веб-порталига ахборотни киритади.

Оператор томонидан Давлат геология қўмитасига баённомага қўшимча равишда аукцион ғолиби тўғрисида маълумотлар (юридик шахснинг давлат рўйхатидан ўтказилган ҳужжат бўйича тўлиқ номи ва СТИР рақами, жисмоний шахснинг паспорти нусхаси ва СТИР рақами) тақдим этилади.

Баённома нусхаси Давлат геология қўмитаси томонидан “Е-ХАТ” электрон почтаси орқали ер қаъри участкаси жойлашган туман (шаҳар) ҳокимлигига жўнатилади.

59. Агар аукцион натижаларига кўра аукцион ғолиби 3 кун ичида ер қаъри участкасидан фойдаланиш ҳуқуқини сотиб олишдан бош тортса, оператор кейинги календарь кундан кечиктирмай охиргидан олдинги таклифни билдирган аукцион иштирокчисига электрон шаклда у аукцион давомида таклиф этган нархда ер қаъридан фойдаланиш ҳуқуқини сотиб олишини таклиф қилади.

Агар охиргидан олдинги таклифни билдирган аукцион иштирокчиси 3 кун ичида ер қаъри участкасидан фойдаланиш ҳуқуқини сотиб олишга розилик билдирса, у аукцион ғолиби деб эътироф этилади ва унга ушбу Низомнинг 56 ва 57-бандларида белгиланган тартибда аукцион натижалари ҳақидаги баённома расмийлаштирилади.

60. Аукцион натижалари ҳақидаги баённома қуйидагилар учун асос ҳисобланади:

Давлат геология қўмитасига – аукцион ғолибига тегишли лицензия расмийлаштириш учун;

тегишли туман (шаҳар) ҳокимлигига – аукцион ғолибига ер участкасини ажратиш ҳақидаги қарорни қабул қилиш учун.

61. Давлат геология қўмитаси ва тегишли туман (шаҳар) ҳокимликлари томонидан аукцион ғолибининг мурожаатига асосан 1 кун муддатда тегишли лицензия ва ер участкасини белгиланган чегараларга мувофиқ ажратиш ҳақидаги қарор берилади. Қарорга мувофиқ бериладиган ер участкаси аниқ географик координаталарга эга бўлиши керак.

Ер участкаларининг чегараларини жойида белгилаш ишлари Ўзбекистон Республикаси Ер ресурслари, геодезия, картография ва давлат кадастри давлат қўмитаси ҳамда Давлат геология қўмитаси ҳузуридаги Кон-геология фаолиятини назорат қилиш инспекциясининг ҳудудлардаги бўлинмалари томонидан бир

вактниг ўзида ер қаъридан фойдаланувчи иштирокида амалга оширилади.

### **6-§. Закалат пулини қайтариш тартиби ва шартлари**

62. Ушбу Низомнинг 63 ва 64-бандларида кўрсатилган ҳолатлардан ташқари, аукцион яқунланганидан ёки ўтказилмаган деб эътироф этилганидан сўнг закалат пули қуйидагиларга қайтарилади:

охиргидан олдинги таклифни билдирган аукцион иштирокчисига – аукцион яқунланган кундан бошлаб 12 иш куни мобайнида;

аукционда иштирок этишга қўйилган ягона иштирокчига – хабарномада кўрсатилган аукцион ўтказиш кунидан бошлаб 6 иш куни мобайнида;

бошқа иштирокчиларга – аукцион яқунланган ёки ўтказилмаган деб эътироф этилганидан кундан бошлаб 3 иш куни мобайнида.

Бунда закалат пули аукцион иштирокчисининг аризасига асосан айнан шу лот бўйича такрорий аукционда қатнашиш учун операторнинг банк ҳисоб рақамида қолдирилиши мумкин.

63. Ушбу Низомнинг 59 ва 60-бандларида белгиланган тартибда аукцион ғолиби бўлган аукцион иштирокчисига закалат пули қайтарилмайди ва у аукцион объектининг сотилган қийматига қўшиб ҳисобланади.

64. Ушбу Низомнинг 56-бандида белгиланган тартибда аукцион объекти қийматининг 100 фоизини тўламаган аукцион иштирокчиларига закалат пули қайтарилмайди ва операторнинг тасарруфида қолади.

### **7-боб. Ер қаъри участкасидан фойдаланиш ҳуқуқини реализация қилишдан тушадиган маблағларни йўналтириш**

65. Оператор томонидан ер қаъри участкасидан фойдаланиш ҳуқуқини “E-EURO AUKSION” электрон савдо майдончасида реализация қилишдан олинган пул маблағлари ва ушлаб қолинган закалат суммаси, аукционни ташкил қилиш хизматлари учун тўлов суммалари чегирилган ҳолда Давлат геология қўмитаси буюртмасида кўрсатилган даромад ғазна ҳисобварағига ўтказилади.

Даромад ғазна ҳисобварағига келиб тушган маблағлар Давлат геология қўмитасининг бюджетдан ташқари жамғармасига ҳамда ер қаъри участкаси жойлашган тегишли туман (шаҳар)лар маҳаллий бюджетлари ўртасида автоматик тарзда тенг улушларда тақсимланади.

### **8-боб. Қимматбаҳо металлларни олтин изловчилар усулида қазиб олиш фаолиятини амалга ошириш учун ер қаъри участкасидан фойдаланиш ҳуқуқи учун лицензия бериш тартиби**

66. Давлат геология қўмитаси томонидан аукцион натижалари бўйича баённома келиб тушгандан сўнг 1 кун муддатда ушбу Низомнинг 5-иловасида келтирилган шаклда тегишли лицензия расмийлаштириб берилади.

Бунда аукцион ғолиби томонидан ушбу Низомнинг 8-10-бандларида кўзда тутилган ер қаъри участкасидан фойдаланиш шартлари имзоланади ва у

лицензиянинг ажралмас қисми ҳисобланади.

Лицензия Давлат геология кўмитасининг буюртмаси бўйича “Давлат белгиси” давлат ишлаб чиқариш бирлашмаси томонидан босмаҳона усулида тайёрланган махсус бланкаларда расмийлаштирилади.

67. Қимматбаҳо металлари олтин изловчилар усулида қазиб олиш фаолиятини амалга ошириш учун ер қаъри участкасидан фойдаланиш ҳуқуқини амалга ошириш у давлат рўйхатидан ўтказилгандан кейин амалга оширилади. Ер қаъри участкаларидан фойдаланишни Давлат рўйхатига олиш Давлат геология кўмитаси томонидан лицензия бериш жараёнида амалга оширилади.

68. Қимматбаҳо металлари олтин изловчилар усулида қазиб олиш фаолиятини амалга ошириш учун ер қаъри участкасидан фойдаланиш ҳуқуқини Давлат рўйхатига олиш реестрга тегишли қайдларни киритиш йўли билан амалга оширилади.

69. Ҳар бир реестрда қуйидагилар кўрсатилган бўлиши керак:

ер қаъридан фойдаланувчи тўғрисидаги асосий маълумотлар (номи, юридик шахснинг ташкилий-ҳуқуқий шакли, солиқ тўловчининг идентификация рақами, почта манзили, телефон ва факс рақамлари);

фойдаланишга берилган ер қаъри участкасининг номи (рақами);

ер қаъри участкасидан фойдаланиш мақсади;

лицензия берилган сана ва унинг рақами;

лицензиянинг амал қилиш муддати;

лицензияни қайта расмийлаштиришнинг асоси ва унинг санаси.

70. Реестрга киритилган маълумотлар давлат ҳокимияти ва бошқаруви органларига тегишли сўровнома асосида берилиши мумкин, уларни бошқа юридик ва жисмоний шахсларга бериш тақиқланади.

71. Лицензияни қайта расмийлаштириш қуйидаги ҳолларда амалга оширилади:

юридик шахс қайта ташкил қилинганда ва номи ўзгарганда;

жисмоний шахснинг номи (Ф.И.Ш.) ўзгарганда.

Лицензияни қайта расмийлаштириш Давлат геология кўмитаси томонидан лицензия эгасининг тегишли тасдиқловчи ҳужжатлар илова қилинган аризаси асосида 1 кун муддатда амалга оширилади.

Лицензияни қайта расмийлаштиришда:

энг кам ойлик иш ҳақининг 2 баробари миқдорида йиғим ундирилади. Йиғим Давлат геология кўмитасининг ғазна ҳисобварағига ўтказилади;

реестрга тегишли ўзгартиришлар киритилади, лицензия эса янги бланкада расмийлаштирилади, бунда олдин берилган лицензия Давлат геология кўмитасида сақланади ва унга “Ҳақиқий эмас” деган муҳр босилади.

72. Ер қаъридан фойдаланиш муддати тугагунга қадар камида 6 ой олдин фойдаланувчи томонидан Давлат геология кўмитасига йўлланган ариза бўйича ер қаъридан фойдаланувчи томонидан лицензияда белгиланган шартлар бажарилган тақдирда ва қимматбаҳо металлари олтин изловчилар усулида қазиб олиш бўйича қўшимча ишларни амалга ошириш зарур бўлган ҳолларда ер қаъридан

фойдаланиш муддатлари бир марта 3 йилга узайтирилиши мумкин.

Ушбу ҳолатда, Давлат геология кўмитаси ҳузуридаги Кон-геология фаолиятини назорат қилиш инспекцияси томонидан 1 ой муддатда лицензияда белгиланган шартларнинг бажарилиши ўрганилади ва Давлат геология кўмитасига тегишли хулосани киритади.

Хулоса ижобий бўлганда, Давлат геология кўмитаси томонидан 10 кун муддатда ер қаъридан фойдаланувчига ер қаъри участкаларидан фойдаланиш муддатини узайтириш учун тўлов суммасини жўнатади.

Ер қаъридан фойдаланувчи лицензияда кўрсатилган ер қаъри участкаларидан фойдаланиш муддати тугашга 10 кун қолган муддатгача Давлат геология кўмитаси томонидан кўрсатилган даромад газна ҳисобварағига лицензияни узайтириш учун тўлов суммасини тўлайди.

Ер қаъри участкаларидан фойдаланиш муддатини узайтириш учун тўлов охириги 1 йил ичида аукцион орқали реализация қилинган ер қаъри участкаларидан фойдаланиш ҳуқуқи қийматларининг ўртача арифметик миқдорига тенг бўлиб, Давлат геология кўмитаси томонидан баённомалар таҳлили асосида ҳисоблаб чиқилади.

Давлат геология кўмитаси томонидан тўлов суммаси даромад газна ҳисобварағига келиб тушганда қуйидагича тақсимланади:

даромад газна ҳисобварағига келиб тушган маблағлар Давлат геология кўмитасининг бюджетдан ташқари жамғармасига ҳамда ер қаъри участкаси жойлашган тегишли туман (шаҳар)лар маҳаллий бюджетлари ўртасида автоматик тарзда тенг улушларда тақсимланади.

Ер қаъридан фойдаланувчига лицензия янги 3 йиллик муддатга қайта расмийлаштириб берилади.

73. Қуйидаги ҳолларда ер қаъридан фойдаланиш муддатларини узайтириш рад этилиши мумкин:

қимматбаҳо металлларни олтин изловчилар усулида қазиб олиш бўйича кўшимча ишларни амалга ошириш зарурияти бўлмаса;

ер қаъридан фойдаланувчи томонидан лицензияда белгиланган шартлар ўз вақтида ва тўлиқ бажарилмаган бўлса;

Давлат геология кўмитаси томонидан тақдим этилган ер қаъри участкаларидан фойдаланиш муддатини узайтириш учун тўлов суммаси ўз вақтида тўланмаса.

Бошқа сабаблар билан ер қаъридан фойдаланиш муддатларини узайтиришни рад этилишига йўл қўйилмайди.

**9-боб. Қимматбаҳо металлларни олтин изловчилар усулида қазиб олиш қондалари ва нормалари, рухсат этилган усуллари ва воситалари, фойдаланиладиган асбоб-ускуналар ва техникага қўйиладиган талаблар**

74. Ер қаъридан фойдаланувчилар томонидан лицензия берилган ер қаъри участкаларида қимматбаҳо металлларни қазиб олиш ишлари бошланишидан олдин маҳаллий ҳокимият органлари, Ўзбекистон Республикаси Экология ва атроф муҳитни муҳофаза қилиш давлат кўмитаси, Саноат хавфсизлиги давлат кўмитаси

ва Давлат геология кўмитаси ҳузуридаги Кон-геология фаолиятини назорат қилиш инспекциясини ёзма равишда хабардор қилиниши шарт.

75. Лицензия билан берилган ер қаъри участкаларида қимматбаҳо металлларни олтин изловчилар усулида қазиб олишда:

ер қаърини муҳофаза қилиш, табиатни муҳофаза қилиш, атроф муҳитни муҳофаза қилиш, ёнғин хавфсизлиги бўйича қоидалар ва чора-тадбирларга амал қилиш зарур;

ер ости тоғ-кон қазилмалари йўлақларсиз ва портловчи моддалардан фойдаланмаган ҳолда хавфсиз (йўл қўйиладиган) чуқурликкача фаолиятни амалга ошириш мумкин;

туб жинслар участкаларида тоғ-кон лаҳмлари тик томонларини 2 (икки) метрдан кўп бўлмаган чуқурликда ўтишга йўл қўйилади;

агар тоғ-кон лаҳмларини зинасимон шаклида ўтаётган бўлса, бу ҳолатда умумий чуқурлиги 6 (олти) метргача рухсат этилади. Бунда ҳар бир зинанинг баландлиги 2 (икки) метрдан ошмаслиги ва зинанинг эни 0,5 (ярим) метрдан кам бўлмаслиги зарур;

сувли ҳудудларда, шу жумладан, дарё қирғоқларида ва сойлар ўзанларида олтин қазиб олиш ҳудудида қовиш сизими (ҳажми) 2 кубгача бўлган экскаваторлар ёки унинг функциясини бажарадиган техникадан фойдаланиш мумкин.

Ҳисобот давридан кейинги йилнинг 15 февралига қадар қимматбаҳо металллар бўйича қуйидагиларни тақдим қилишлари зарур:

Давлат геология кўмитаси ҳузуридаги Кон-геология фаолиятини назорат қилиш бўйича ҳудудий инспекцияларга қимматбаҳо металллар захираларининг ҳаракатланиш ишлари тўғрисида йиллик ҳисобот (сочма олтин конлари бўйича);

Ўзбекистон Республикаси Марказий банк ҳузуридаги қимматбаҳо металллар агентлигига қимматбаҳо металлларни топширилган миқдори тўғрисида ҳисобот.

76. Ер қаъридан фойдаланувчилар қазиб олинган тоғ жинсларидан қимматбаҳо металлларни ажратиб олишда фақат майдалаш ва гравитация усулини қўллаш, шунингдек, кичик ювиш ускуналари ва насослардан фойдаланиш ҳуқуқига эга.

77. Лицензия билан берилган ер қаъри участкаларида қимматбаҳо металлларни олтин изловчилар усулида қазиб олишда ва ажратиб олишда қуйидагилар тақиқланади:

ушбу Низомнинг 74 ва 75-бандларида кўзда тутилмаган усуллар, шу жумладан, ер ости тоғ-кон йўлақларини қазиб, портлатиш ишларини олиб бориш;

қазиб олинган тоғ жинсларини ажратилган ер участкаси ҳудудидан олиб чиқиб кетиш ёки сотиш;

кимёвий реагентлар қўлланилган ҳолда қимматбаҳо металлларни ажратиб олиш технологиясидан фойдаланиш;

ажратилган ер участкаси ҳудудида капитал қурилиш ишларини амалга ошириш;

ер қаъри участкасидан фойдаланишда амалдаги қоидалар ва норматив ҳужжатлар талабларини бузиш.

## **10-боб. Олтин изловчилар усулида қазиб олинган қимматбаҳо металллар нархини белгилаш, уларни харид қилиш, ҳисобини юритиш, сақлаш ва реализация қилиш тартиби**

### **1-§. Қимматбаҳо металлларни сотиб олувчи қабул кассалари**

78. Ер қаъридан фойдаланувчилар томонидан белгиланган тартибда ажратиб олинган қимматбаҳо металллар қабул кассаларига, шунингдек, заргарлик буюмлари ишлаб чиқариш учун лицензияга эга бўлган юридик шахсларга ва якка тадбиркорларга келишилган нархларда реализация қилинади.

79. Қабул кассаси олтинни қайта ишлаш корхоналари билан шартнома асосида ер қаъридан фойдаланувчилардан таркибида олтин бўлган хомашёни (шлих, концентрат) қабул қилувчи пункт ҳисобланади.

80. Қабул кассалари ер қаъридан фойдаланувчилар томонидан республика ҳудудида қазиб олинган таркибида қимматбаҳо металллар бўлган хомашёни қабул қилиш, сақланишини таъминлаш ва қайта ишлашга жўнатиш мақсадида тузилади.

81. Қабул кассалари қимматбаҳо металлларни қазиб олиш ва улар билан боғлиқ операцияларни амалга ошириш ҳуқуқини берувчи лицензияга эга ташкилотлар томонидан тузилиши мумкин.

Қабул кассалари заргарлик буюмлари ишлаб чиқариш учун лицензияга эга бўлган юридик шахслар томонидан ҳам очилиши мумкин.

82. Қабул кассалари таркибида қимматбаҳо металллар бўлган хомашёларни қайта ишлаш ва аффинажга юборишга мажбур.

83. Ер қаъридан фойдаланувчилар қазиб қўлга киритган қимматбаҳо металллар аралашмасининг барчасини, жумладан, соф ҳолда топилганларини ҳам қабул кассаларига топширишга мажбур.

84. Қабул кассалари ер қаъридан фойдаланувчидан таркибида қимматбаҳо металл бўлган хомашёларни қабул далолатномасини расмийлаштирган ҳолда воситачилик асосида қабул қилади.

### **2-§. Қабул кассаларида қимматбаҳо металлларни сақлашни таъминлаш**

85. Қимматбаҳо металллар ва уларнинг концентратларини сақлаш жойларида ўрнатилган сейфларда, яъни махсус жиҳозланган қабул кассаларида, мустақкам деворли, бетон полли, деразасиз, металлдан ясалган ёки темир билан копланган махсус ички қулфли эшикли хоналарда амалга оширилиши керак.

86. Қабул кассаларига кириш эшиги махсус қулф билан жиҳозланган ҳамда сақлаш жойларининг эшикларига илгакларни ва муҳрларнинг ҳолатини кўздан кечириш имкони бўлган кўриш дарчасига эга бўлиши керак. Қабул кассаларининг эшигига киришгача ва ундан кейин пўлат симдан тайёрланган панжарали эшиклар ўрнатилади.

87. Қабул кассаларида иш столи, тушган ва жўнатиладиган металлни ўлчаш учун тарози, металл идиши ва асбобларни, бошқа ускуналарни сақлаш шкафлари ўрнатилади.

88. Қабул кассалари телефон алоқаси, камида икки поғонали кўриқлов ва ёнгин-кўриқлаш сигнализациялари ҳамда туну кун қуролланган кўриқлов пости билан таъминланади.

89. Қабул кассаларининг деразалари металл панжалардан иборат бўлиши керак. Қабул кассаларининг хонаси ҳамда унинг пости симсиз, ишончли ишлайдиган, бинодан ташқарига, масъул шахсларнинг доимий туну кун навбатчилик жойларига чиқарилган сигнализация билан таъминланади, масалан: милиция бўлими, идоровий ҳарбий кўриқловнинг соқчи жойи, муассаса коммутатори.

90. Алоҳида ҳолларда қимматбаҳо металлари (концентратларни) сақлаш учун сейф ўрнига ички махсус қулфлар билан жиҳозланган металл шкафларнинг ишлатилишига вақтинча йўл қўйилади.

91. Иш куни тамом бўлгандан сўнг сейфлар, қимматбаҳо металлари сақлаш жойи ҳамда қабул кассалари ёпилади, муҳрланади ва кўриқлаш учун топширилади. Хоналарни қабул қилиш ва топшириш, режимли хоналарни кўриқлаш учун қабул қилиш ва топшириш журналида расмийлаштирилади.

92. Қабул кассасига кириш учун рухсат фақат чегараланган доирадаги, рўйхати муассаса раҳбари ёки унинг режим ва кўриқлаш бўйича ўринбосари томонидан аниқланувчи шахсларга берилади. Қабул кассаси хоналарига кириш учун рухсат берилган шахсларнинг рўйхати ушбу объектнинг туну кун ишлайдиган қуролланган кўриқлаш постида бўлиши керак.

93. Таркибида қимматбаҳо металл бўлган хомашёни қабул кассаларига етказиш ер қаъридан фойдаланувчилар томонидан амалга оширилади.

### **3-§. Қимматбаҳо металлари нархлаш, ҳисоблаш ва сотиб олиш тартиби**

94. Қимматбаҳо металлларнинг хомашёдаги нархи шартнома асосида ер қаъридан фойдаланувчилар ва қабул кассалари томонидан хомашёни қабул кассасига топшириш пайтида белгиланади.

Бунда, таркибида қимматбаҳо металл бўлган қайта ишланган масса, таҳлил натижаларига кўра қимматбаҳо металлни тайёр кўринишгача ажратиб олишни ҳисобга олган ҳолда оғирлик ҳисоб-китоби тузилади.

95. Таркибида қимматбаҳо металл бўлган хомашё нархини ҳисоблашда қуйидаги формула қўлланади:

Хомашё нархи = қимматбаҳо металлларнинг миқдори  $\times$  ажратиб олиш коэффиценти  $\times$  қимматбаҳо металлларнинг халқаро бозорлардаги нархи – қайта ишлаш харажатлари:

Бунда, қимматбаҳо металл миқдори – оғирлик ҳисоб-китобига кўра;

ажратиб олиш коэффиценти – хомашёга кўра қайта ишлаш корхоналарида тасдиқланган металлари ажратиб олиш меъёрларига мувофиқ аниқланади;

қимматбаҳо металлларнинг халқаро бозорлардаги нархи – қимматбаҳо металлларнинг Лондон биржасидаги нархлардан келиб чиқиб (АҚШ долларларида, эрталабки ўрнатилган фиксингда), металлни реализация қилиш (топшириш) санаси бўйича Ўзбекистон Республикаси Марказий банкининг расмий маълумотларига кўра чет эл валютаси курси билан сўмга қайта ҳисобланган нархда аниқланади;

қайта ишлаш харажатлари (1 граммга) – зарур бўлган фойдани ҳисобга олган ҳолда қайта ишлашга кетадиган харажатлардан келиб чиқиб қабул қилинади.

Ҳар бир қабул кассасида ушбу формула ва ҳисоб-китобларнинг намуналари ҳақидаги маълумотлар жойлаштирилиши шарт.

96. Таркибида қимматбаҳо металллар бўлган хомашё топширилгандан сўнг қабул кассасининг ер қаъридан фойдаланувчи билан ҳисоб-китоби шартнома асосида 10 кундан ошмаган муддатда қабул кассасининг белгиланган ички тартибига мувофиқ амалга оширилади.

#### **4-§. Қимматбаҳо металлларни қабул қилиш тартиби ва мажбуриятлар**

97. Қабул кассаларига тупадиган таркибида қимматбаҳо металллар бўлган хомашё уни топширувчи ер қаъридан фойдаланувчининг иштирокида ўлчаб олинади. Топшириш ва қабул қилиш махсус журналда топширувчи ҳамда қабул қилувчининг имзолари асосида расмийлаштирилади.

Бунда, топшириш ва қабул қилиш махсус журналининг варақлари рақамланган, тикилган ва муҳрланган бўлиши шарт.

98. Ер қаъридан фойдаланувчилардан қабул кассаларига тушувчи таркибида қимматбаҳо металллар бўлган хомашёлар ҳисоби раҳбарнинг буйруғи асосида муайян ижрочига юклатилади (жавобгарликни юклаш ҳамда мулкка жавобгар шахснинг тегишли мажбуриятини расмийлаштириш билан).

99. Намуналарни синаш ва кимёвий таҳлилга тайёрлаш қайта ишловчи корхоналарнинг амалдаги стандартлари, йўриқномалари ҳамда синаш усулларига мувофиқ техник назорат хизмати орқали амалга оширилади.

100. Намунани кимёвий лабораторияга етказиш техник назорат хизмати назоратчиси томонидан ҳарбий қўриқчи ҳамроҳлигида амалга оширилади.

101. Марказий таҳлил лабораторияси тасдиқланган усулга асосан барча турдаги хомашё таркибидаги қимматбаҳо металлларни аниқлаш бўйича таҳлил ўтказилади.

102. Таркибида олтин бўлган хомашёни синашда уч хил намуна шаклланади: бири – қайта ишлаш корхоналар таҳлили учун; иккинчиси – ер қаъридан фойдаланувчилар учун; учинчиси эса – арбитраж учун.

103. Қабул кассасининг моддий жавобгар шахси таркибида қимматбаҳо металллар бўлган хомашёларни келгуси қайта ишлаш ва қимматбаҳо металлларни ажратиб олишга юборгунга қадар барча чора-тадбирларни кўради.

104. Қабул кассалари таркибида қимматбаҳо металллар бўлган хомашёларни қабул қилиш, сарф қилиш ҳамда уларнинг қолдиқлари бўйича қатъий ҳисоб олиб бориш ва белгиланган муддатда инвентаризация ўтказишга мажбур.

105. Заргарлик буюмлари ишлаб чиқариш учун лицензияга эга бўлган юридик шахслар томонидан тузилган қабул кассаларида қимматбаҳо металлларни сақлаш ва қабул қилиш тартиби ва мажбуриятлари ушбу юридик шахс томонидан ишлаб чиқилади.

Шу билан бирга, қимматбаҳо металлларни олтин изловчилар усулида қазиб олиш фаолияти билан шуғулланувчи тадбиркорларга қулайлик яратиш мақсадида заргарлик буюмлари ишлаб чиқариш учун лицензияга эга бўлган юридик шахслар томонидан сайёр қабул кассалари ташкил этишга рухсат берилади.

106. Ушбу Низомнинг 85-92, 95, 100-104 бандларидаги қимматбаҳо металлларни сақлаш, қабул қилиш тартиби ва мажбуриятлар қабул кассаларини ташкил этган ташкилотларда давлат улуши бўлган субъектларга нисбатан мажбурий ҳисобланади ва заргарлик буюмлари ишлаб чиқариш учун лицензияга эга бўлган давлат улушига эга бўлмаган юридик шахсларга ихтиёрий равишда амал қилиш тавсия этилади.

**11-боб. Қимматбаҳо металлларни олтин изловчилар усулида қазиб олиш фаолиятини амалга ошириш учун ер қаъри участкасидан фойдаланиш ҳуқуқини чеклаш, тўхтатиб туриш ва бекор қилиш шунингдек, ер қаъридан фойдаланувчиларнинг қонун ҳужжатлари талабларини бузганлик учун жавобгарлиги**

107. Ер қаъри участкасидан фойдаланиш ҳуқуқи “Ер ости бойликлари тўғрисида” Ўзбекистон Республикаси Қонунининг 34-моддасида назарда тутилган ҳолларда чекланиши, тўхтатиб қўйилиши ёки муддатидан олдин бекор қилиниши мумкин.

108. Ер қаъри участкасидан фойдаланиш ҳуқуқини чеклаш, тўхтатиб қўйиш ер қаърини геологик ўрганиш, ундан фойдаланиш ва муҳофаза қилиш юзасидан давлат назорат органлари томонидан қонун ҳужжатларида белгиланган тартибда амалга оширилади.

109. Ер қаъри участкасидан фойдаланиш ҳуқуқини муддатидан олдин бекор қилиш Давлат геология қўмитаси томонидан, шу жумладан, бошқа давлат назорати органларининг тақдимномалари асосида амалга оширилади.

110. Ер қаъри участкаларидан фойдаланиш ҳуқуқининг чекланиши юзага келган хавф-хатар ёки ер қаъридан фойдаланишда йўл қўйилган талаблар ва шартлар, ишларни олиб бориш меъёрлари ва қоидалари бартараф этилишигача ишларнинг чекланишига олиб келади. Бунда чекланиш муддати 3 ойдан ошмаслиги шарт.

111. Ер қаъри участкаларидан фойдаланиш ҳуқуқининг тўхтатилиши ер қаъри участкаларидан фойдаланиш билан боғлиқ бўлган барча турдаги ишлар тўхтатиб қўйилиши сабаблари бартараф этилгунига қадар амалга оширилиши тақиқланишига, бироқ 3 ойдан ошмайдиган муддатга тақиқланишига олиб келади, ускуналарни одамлар ва атроф муҳит учун хавфсиз сақлаб туришга оид ишлар бундан мустасно.

112. Қимматбаҳо металлларни яшириш, шу жумладан, уни 6 ой ичида реализация қилмаслик, шунингдек, қимматбаҳо металлларни олтин изловчилар усулида қазиб олиш чоғида ишларни бехатар олиб бориш талабларининг бузилиши оқибатида инсонларнинг оғир тан жароҳати олиши ёки ўлимига олиб келиши ер қаъри участкаларидан фойдаланиш ҳуқуқини муддатидан олдин бекор қилиш ва мазкур фаолият билан шуғулланишни 1 йил давомида чеклаш учун асос бўлади.

113. Ер қаъри участкаларидан фойдаланиш ҳуқуқи:

ер қаъридан фойдаланувчи 1 йил ичида ер қаъри участкасидан фойдаланишни бошламаган;

ер қаъридан фойдаланувчи томонидан ер қаъри участкасидан фойдаланишнинг асосий шартлари бузилган;

ер қаъри участкаларидан фойдаланиш билан боғлиқ ишларнинг таъсир зонасида аҳоли ҳаёти ва соғлиғига, атроф муҳитга хавф-хатарнинг мавжуд бўлиши;

Ўзбекистон Республикаси “Ер ости бойликлари тўғрисида” Қонунининг 33, 35, 37 ва 40-моддаларида назарда тутилган қоидаларга риоя қилинмаслиги;

агар йўл қўйилган қоидабузарликлар тизимли тавсифга эга бўлса ёки ушбу ер қаъри участкасидан фойдаланиш ҳуқуқига илгари чеклов ва (ёки) тўхтатиб туриш қўлланган ҳолатларда муддатидан олдин бекор қилиниши мумкин.

Ер қаъри участкасидан фойдаланиш ҳуқуқини муддатдан олдин бекор қилиш тўғрисидаги қарор давлат назорат органларидан ёзма хабар олинган кундан эътиборан Давлат геология кўмитаси томонидан 3 кун муддатда қабул қилинади.

114. Ер қаъри участкасидан фойдаланиш ҳуқуқи тўхтатилганидан кейин фойдаланувчи ер қаъридан фойдаланиш чоғида бузилган ер участкаларини кейинчалик уларни фойдаланишга яроқли ҳолга келтириш ишларини (қайта тиклаш) бажаришга киришиши шарт.

**12-боб. Ер қаъридан фойдаланувчилар томонидан ер участкасини рекультивация қилиш (қайта тиклаш) ва уларни маҳаллий давлат ҳокимияти органларининг захира фондига қайтариш тартиби**

115. Ер қаъри участкасидан фойдаланиш ҳуқуқи тугатилгандан сўнг ер қаъридан фойдаланувчилар ўз ҳисобларидан тегишли ер участкаларини рекультивация қилиш (қайта тиклаш) йўли билан кейинчалик фойдаланиш учун яроқли ҳолатга келтиришга мажбур.

116. Ер участкаларини рекультивация қилиш (қайта тиклаш) лойиҳалари Ўзбекистон Республикаси Ер ресурслари, геодезия, картография ва давлат кадастри давлат кўмитаси тизимидаги “Ўздаверлойиҳа” институти ва унинг ҳудудий бўлинмалари томонидан 15 кун ичида амалга оширилади.

117. Бузилган ерларни рекультивация қилиш (қайта тиклаш) лойиҳаларида қуйидагилар назарда тутилади:

тупроқнинг ҳосилдор қатламининг кесиб олиниши ва махсус жойга жойлаштирилиши (сақланиши);

тошлоқ ва заҳарли жинсларни потенциал ҳосилдор тупроқлардан ажратиш мақсадида ер қаъри юзини очишдаги қатлам жинсларининг селектив ишланиши;

заҳарли жинслар кўмилишини таъминлайдиган ағдарилган тупроқ қатламларини шакллантириш;

ўпирилган жойларни тўлдириш;

ер қаъри участкасидан фойдаланиш тугаган майдонларнинг нишаблиқда текисланиши;

тупроқ катламининг текисланган юзаси кирқиш чуқурлигига тенг ёки потенциал ҳосилдорлик даражасидан кам бўлмаган миқдорда ётқизилиши;

қияликлар (ён бағирлар)ни мустақкамлаш бўйича махсус тадбирларни амалга ошириши;

рекультивация қилиш (қайта тиклаш)ни амалга ошириш жараёнида ва у яқунлангандан сўнг ишчилар ва аҳоли хавфсизлигини таъминлаш чоралари.

118. Бузилган ерларни рекультивация қилиш (қайта тиклаш) лойиҳаларининг амалга оширилиши юзасидан лойиҳачи томонидан муаллифлик назорати олиб борилади.

Ер участкаларини рекультивация қилиш (қайта тиклаш) ишлари тегишли лойиҳалар билан кўзда тутилган муддатларда бажарилади. Бунда ер участкаларини рекультивация қилиш (қайта тиклаш) ишларининг муддати 3 ойдан ошмаслиги шарт.

Ердан фойдаланган юридик ёки жисмоний шахслар ҳисобидан бузилган ерларда рекультивация қилиш (қайта тиклаш) лойиҳалари асосида ишлар амалга оширилгандан сўнг ваколатли органларнинг тегишли тартибдаги қарорларига асосан маҳаллий давлат ҳокимияти органларининг заҳира ер фондига қайтарилади.

### **13-боб. Яқунловчи қоида**

119. Ушбу Низом талаблари бузилишида айбдор бўлган шахслар қонун ҳужжатларига мувофиқ жавоб берадилар.

Қимматбаҳо металлларни олтин изловчилар усулида  
қазиб олиш фаолиятини амалга ошириш  
тартиби тўғрисида Низомга  
1-илова

Қимматбаҳо металлларни олтин изловчилар усулида қазиб олиш учун  
берилаётган ер қаъри участкаларидан фойдаланиш ҳукуқи электрон  
онлайн-аукцион орқали бериш  
СХЕМАСИ

Босқичлар	Субъектлар	Тадбирлар	Муддатлар
1-босқич (тайёргарлик босқичи)	Вазирлар Маҳкамаси	Қимматбаҳо металлларни олтин изловчилар усулида қазиб олиш учун бериладиган ер қаъри участкалари рўйхатини тасдиқлайди.	Ҳар йили 1 февралгача
	Давлат геология қўмитаси	Ер қаъридан фойдаланиш ҳуқуқини аукционда реализация қилиш учун буюртмаларни «Электрон онлайн- аукционларни ташкил этиш маркази» давлат унитар корхонасига (операторга) тақдим этади.	5 кун
	Оператор	Аукцион ўтказилиш тўғрисидаги хабарномани ўз веб-порталида жойлаштиради.	1 кун
2-босқич (аукцион ўтказиш ва лицензия бериш)	Юридик ва жисмоний шахслар	Аукционда иштирок этиш учун электрон шаклда ариза топширади, унда лот рақами ва ер қаъри участкаси номини кўрсатади.	4 кун
	Оператор	Лот бўйича электрон аукцион савдолари ўтказилади.	1 кун
	Аукцион ғолиби	Аукционда ғолиб бўлиш учун таклиф этилган суммани 100 фоиз тўлайди.	3 кун
	Оператор	Ўтказилган аукцион натижалари ҳақидаги баённомани расмийлаштиради, аукцион ғолибининг шахсий кабинетига ва Давлат геология қўмитасига тақдим этади.	1 кун
	Давлат геология қўмитаси	Оператор томонидан тақдим этилган баённома асосида тегишли лицензияни расмийлаштириб беради.	1 кун

Қимматбаҳо металлларни олтин изловчилар  
усулида қазиб олиш фаолиятини амалга  
ошириш тартиби тўғрисида Низомга  
2-илова

Ер қаъри участкасидан фойдаланиш ҳуқуқини реализация қилиш бўйича  
электрон онлайн-аукцион ташкил қилиш ҳақида  
**ЭЛЕКТРОН БУЮРТМА**

20\_\_ йил «\_\_» \_\_\_\_ да \_\_\_\_\_ Давлат геология ва минерал ресурслар  
қўмитаси ва “Электрон онлайн-аукционларни ташкил этиш маркази” ДУК ўртасида  
тузилган \_\_\_\_-сон шартномага мувофиқ, Давлат геология қўмитаси куйидаги ер қаъри  
участкасидан фойдаланиш ҳуқуқини электрон аукционда реализация қилиш учун ушбу  
буюртмани тақдим этади:

1. Ер қаъри участкасининг номи (рақами) ва жойлашган жойи (географик  
координатали нукталари билан Google харита дастурида геолокацияси  
билан) \_\_\_\_\_  
\_\_\_\_\_;

2. Ер қаъри участкасидан фойдаланишдан мақсад  
\_\_\_\_\_  
\_\_\_\_\_;

3. Ер қаъри участкасининг майдони (гектарда) \_\_\_\_\_;

4. Ер қаъри участкаларидан фойдаланиш ҳуқуқини савдога қўйишнинг  
бошланғич нархи (сўмда) \_\_\_\_\_;

5. Ер қаъри участкасидан фойдаланиш ҳуқуқи муддати \_\_\_\_\_;

6. Ер қаъри участкасидан фойдаланиш шартлари \_\_\_\_\_;

7. Ер қаъри участкасидан фойдаланиш ҳуқуқини реализация қилишдан тушган  
маблағлар ўтказилиши мумкин бўлган банк реквизитлари:

Банк номи  
\_\_\_\_\_  
\_\_\_\_\_;

Банк МФО  
\_\_\_\_\_  
\_\_\_\_\_;

Банк ҳисоб рақами  
\_\_\_\_\_  
\_\_\_\_\_;

8. Давлат геология қўмитасининг манзили ва боғланиш учун маълумотлари  
(телефон рақами, электрон почта манзили ва бошқалар), лицензия олиш жойи ва қабул  
вақтлари тўғрисидаги маълумот.

Ер қаъри участкаси жойлашган жойнинг фотосурати (15x20 см) илова қилинади.

Буюртма 20\_\_ йил «\_\_» \_\_\_\_ да тақдим этилди.

Давлат геология қўмитаси раиси \_\_\_\_\_

(Ф.И.Ш.)

ЭРИ

Қимматбаҳо металлари олтин изловчилар усулида  
қазиб олиш фаолиятини амалга ошириш  
тартиби тўғрисида Низомга  
3-илова

**Электрон онлайн-аукционда иштирок этиш учун  
ЭЛЕКТРОН АРИЗА**

(юридик ёки жисмоний шахснинг тўлиқ номи, почта манзили, банк реквизитлари)  
(кейинги ўринларда иштирокчи деб аталади) ер қаъри участкасидан фойдаланиш  
ҳуқуқини реализация қилиш тўғрисида электрон аукцион ўтказилиши ҳақидаги  
хабарнома билан танишдим:

Лот рақами: № \_\_\_\_\_

Лот номи: \_\_\_\_\_

ҳужжат бўйича электрон аукционда иштирок этиш учун закат пулини тўлаб,

(тўлов ҳужжатининг реквизитлари)

ер қаъридан фойдаланиш ҳуқуқини реализация қилиш бўйича электрон аукцион ўтказиш  
қоидалари (кейинги ўринларда қоидалар деб аталади) билан танишдим, 20\_\_ йил  
« \_\_\_\_ » \_\_\_\_\_ соат \_\_\_\_\_ да веб-порталда ўтказиладиган электрон аукционда  
иштирок этиш учун ушбу аризани қабул қилишингизни сўрайман.

Иштирокчи электрон аукционда иштирок этиш учун ушбу аризани тақдим этиб,  
электрон аукционни ўтказиш бўйича қоидаларда белгиланган шартларга розилик беради.

Иштирокчи унинг маълумотлари нотўғри бўлган тақдирда, аукцион натижалари  
ҳақиқий эмас деб эътироф этилиши ва закат пули қайтариб берилмаслиги ҳақида  
огоҳлангирилди.

Иштирокчи электрон аукционга ер қаъри участкасидан фойдаланиш ҳуқуқи  
Вазирлар Маҳкамаси томонидан тасдиқланган ер қаъри участкалари рўйхати асосида  
реализация қилинаётгани тўғрисида хабардор қилинди ва иштирокчи аукцион ғолиби  
деб топилганда унга юкланадиган талаб ҳамда мажбуриятларга риоя этишни зиммасига  
олади.

Иштирокчи “E-IJRO AUKSION” ягона электрон савдо майдони операторидан ҳар  
қандай билдиришномани иштирокчининг куйидаги электрон почта манзилида олишини  
расман тасдиқлайди \_\_\_\_\_.

(электрон почта манзили)

Иштирокчи “E-IJRO AUKSION” ягона электрон савдо майдони оператори ушбу  
электрон почта манзилига юборган билдиришномалар жўнатилган вақтда расман  
олинган деб ҳисобланишини ва “E-IJRO AUKSION” ягона электрон савдо майдони  
иштирокчиси ушбу билдиришномаларни ўз вақтида ўқимагани учун жавоб  
бермаслигини тасдиқлайди.

Заказат пулини қайтариш учун иштирокчининг банк реквизитлари:

Банк номи \_\_\_\_\_;

Банк МФО \_\_\_\_\_;

Банкнинг ҳисоб рақами \_\_\_\_\_;

Иштирокчининг СТИРи: \_\_\_\_\_

Илова: иштирокчи электрон аукцион ўтказиш ҳақидаги билдиришномада  
кўрсатилган банк ҳисоб рақамига закат пулини ўтказганини тасдиқловчи тўлов  
ҳужжатининг ва жисмоний шахс паспортининг электрон (сканер қилинган) нусхалари.

Тўлдирилган сана: 20\_\_ йил « \_\_\_\_ » \_\_\_\_\_

Иштирокчининг электрон рақамли имзоси (ЭРИ)

Қимматбаҳо металларни олтин изловчилар усулида  
казиб олиш фаолиятини амалга ошириш  
тартиби тўғрисида Низомга  
4-илова

**Электрон онлайн-аукционда иштирок этиш учун аризани  
ўзгартириш ёки чақириб олиш тўғрисида  
БИЛДИРИШНОМА**

Ушбу \_\_\_\_\_

(юридик тўлик номи ёки жисмоний шахснинг фамилияси, исми, шарифи, почта манзили)

\_\_\_\_\_ га (электрон аукцион ўтказиладиган сана)  
белгиланган \_\_\_\_\_-сон лот бўйича электрон аукционда иштирок этиш учун ўз  
аризасини ўзгартиради ёки чақириб олади.

Ушбу билдиришнома орқали ўзгартиришлар аризанинг \_\_\_\_\_

\_\_\_\_\_ (аризанинг ўзгартириладиган қисмлари ва ўзгараётган маълумотлар)  
қисмларига тааллуқли.

Сана \_\_\_\_\_

Иштирокчининг электрон рақамли имзоси (ЭРИ)

Қимматбаҳо металлларни олтин изловчилар усулида  
қазиб олиш фаолиятини амалга ошириш  
тартиби тўғрисида Низомга  
5-илова



**ЎЗБЕКISTON RESPUBLIKASI**  
**DAVLAT GEOLOGIYA VA MINERAL RESURLAR QO'MITASI**

**Қимматбаҳо metallarni oltin izlovchilar usulida qazib olishda**  
**yer qa'ri uchastkasidan foydalanish huquqi uchun**  
**LITSENZIYA**

SERIYASI

TARTIB RAQAMI

Litsenziya \_\_\_\_\_ ga berildi.

*(ushbu litsenziyani olgan yuridik yoki jismoniy shaxs)*

Litsenziya qimmatbaho metallarni oltin izlovchilar usulida qazib olish faoliyatini amalga oshirish uchun yer qa'ri uchastkasidan foydalanish huquqini tasdiqlaydi.

Yer qa'ri uchastkasining nomi (yoki raqami) \_\_\_\_\_

Yer qa'ri uchastkasi \_\_\_\_\_ da joylashgan.

*(Qoraqalpog'iston Respublikasi yoki viloyat tumani, aholi punkti nomi)*

Litsenziya berish uchun asos \_\_\_\_\_

*(tegishli hujjatning turi, nomi, tartib raqami va qabul qilingan sanasi)*

Yer qa'ri uchastkasining maydoni \_\_\_\_\_  
*(gektarda, son va so'z bilan)*

Litsenziyaning amal qilish muddati \_\_\_\_\_  
*(kun, oy, yil)*

Quyidagilar litsenziyaning ajralmas qismi hisoblanadi:

Yer qa'ridan foydalanish shartlari \_\_\_\_\_  
*(ilovaning tartib raqamlari, varaqalar soni)*

Yer qa'ri uchastkasining geografik koordinatali nuqtalari \_\_\_\_\_

Litsenziya berilgan sana \_\_\_\_\_ y. "\_\_\_\_" \_\_\_\_\_

**O'zbekiston Respublikasi**  
**Davlat geologiya va mineral**  
**resurslar qo'mitasi Raisi**

M.O'. \_\_\_\_\_  
*(imzo) (F.I.Sh.)*

20 \_\_\_\_ y. "\_\_\_\_" \_\_\_\_\_

